

VENDIM
Nr.284, datë 14.5.2014

**PËR MIRATIMIN E RREGULLAVE TË HOLLËSISHME PËR ORGANIZIMIN DHE
FUNKSIONIMIN E BRENDSHËM TË BAZËS SË TË DHËNAVE ELEKTRONIKE TË AKTEVE**

Në mbështetje të nenit 100 të Kushtetutës, të nenit 4 të ligjit nr. 10 325, datë 23.9.2010, “Për bazat e të dhënave shtetërore”, të nenit 12, pika 1, të ligjit nr. 96/2012, “Për Qendrën e Botimeve Zyrtare”, me propozimin e ministrit të Drejtësisë, Këshilli i Ministrave

VENDOSI:

I. ORGANIZIMI I BAZËS SË TË DHËNAVE ELEKTRONIKE TË AKTEVE

1. Baza e të dhënave elektronike të akteve administrohet nga Qendra e Botimeve Zyrtare (QBZ), me qëllim krijimin e bazës së të dhënave elektronike të akteve, duke përfshirë në të pasqyrimin në format elektronik të fletoreve zyrtare, akteve të botueshme dhe të akteve të përditësuara, së bashku me ndryshimet.

2. Objekt i këtij vendimi është krijimi i bazës së të dhënave elektronike të akteve, i cili përcakton të dhënat parësore dhe dytësore, dhënësin/dhënësit e informacionit, ndërveprimin me baza të tjera të të dhënave, si dhe nivelin e aksesimit për subjektet e interesuara.

3. Të dhënat që përmban sistemi ndahen përkatësisht në:

a) të dhëna parësore, të cilat kanë të bëjnë me botimin e ligjeve, akteve normative të Këshillit të Ministrave, ministrave dhe drejtuesve të institucioneve qendrore, vendimet e Gjykatës Kushtetuese, vendimet për njësimin ose ndryshimin e praktikës gjyqësore të Gjykatës së Lartë, si dhe të gjitha aktet e tjera botimi i të cilave është i detyrueshëm me ligj;

b) të dhëna dytësore, të cilat kanë të bëjnë me të dhënat që do të merren nga ndërveprimi me baza të dhënash të tjera.

4. Institucioni administrues i sistemit dhe bazës së të dhënave është Qendra e Botimeve Zyrtare.

5. Dhënëse të informacionit janë të gjitha institucionet shtetërore të përmendura në shkronjën “a” të pikës 3 të këtij vendimi.

6. Kërkimi për lexim në bazën e të dhënave elektronike është i lirë për çdo subjekt të interesuar.

7. Baza e të dhënave elektronike të akteve përbëhet nga dy rubrika të veçanta:

a) Fletoret zyrtare;

b) Aktet e botuara.

8. Rubrikat përbëhen nga *link-e* të veçanta të vendosura në to, të cilat bëjnë të mundur aksesimin/kërkimin në mënyrë të drejtpërdrejtë në bazën e të dhënave elektronike të akteve.

9. Në rubrikën “Fletore zyrtare” gjenden të gjitha fletoret zyrtare të botuara në formatin elektronik.

10. Në rubrikën “Aktet e botuara” gjenden të botuara, në formatin elektronik, të gjitha aktet që janë të botuara në fletoret zyrtare:

a) në versionin e tyre aktual në fuqi;

b) në versionin e tyre fillestar të hyrjes në fuqi;

c) të gjitha aktet ndryshuese.

Versioni sipas shkronjës “a” mund të përmbledhë edhe shkronjat “b” dhe “c”, duke bërë të mundur pasqyrimin e secilës prej tyre në një format të vetëm elektronik.

11. Rubrika “Aktet e botuara” përfshin një nënrubrikë të veçantë, e cila përmban të gjitha aktet e botuara, të nxjerra në bazë dhe për zbatim të një akti tjetër të botuar. Kjo nënrubrikë do të përfshijë, dhe jo vetëm, të gjitha aktet nënligjore të nxjerra në bazë dhe për zbatim të një akti tjetër të botuar.

12. Identifikimi i akteve të botuara, në arkivin elektronik, kryhet nëpërmjet kërkimit të një ose disa të dhënave, si më poshtë vijon:

a) Numri i aktit;

b) Data e miratimit të aktit;

c) Titulli i aktit;

ç) Organi që e ka nxjerrë;

d) Lloji i aktit;

dh) Fusha e veprimtarisë së llojit të aktit;

e) Numri dhe data e botimit të Fletores Zyrtare.

13. Në çdo rast, për botimin në bazën e të dhënave elektronike të akteve do të shërbejnë afatet ligjore të parashikuara në ligjin nr. 96/2012, “Për Qendrën e Botimeve Zyrtare”.

II. FUNKSIONIMI I BAZËS SË TË DHËNAVE ELEKTRONIKE TË AKTEVE

1. Në Qendrën e Botimeve Zyrtare caktohet sektori administrativ përgjegjës për funksionimin e bazës së të dhënave elektronike të akteve.

2. Pas përgatitjes për botim së çdo “Fletoreje zyrtare”, sipas kërkesave të ligjit nr. 96/2012, “Për Qendrën e Botimeve Zyrtare”, sektori përgjegjës, i përcaktuar sipas pikës 1 të këtij kreu, kryen:

a) në të njëjtën kohë botimin e saj tek rubrika “Fletoret zyrtare”;

b) botimin brenda një kohe sa më të shkurtër të akteve të botuara tek rubrika “Akte të botuara” dhe, nëse ka, duke bërë edhe përditësimet përkatëse.

3. Botimi i akteve sipas shkronjave “a” dhe “b” të pikës 2 të këtij kreu, bëhet në format PDF dhe në *Word*.

4. Botimi i të gjitha akteve, sipas këtij kreu, shfaqet në faqen zyrtare elektronike të Qendrës së Botimeve Zyrtare dhe nëpërmjet motorëve të kërkimit synohet të shfaqet e gjithë përmbajtja e tyre.

5. Kërkimi i avancuar i një akti të botuar bëhet mbi bazën e të dhënave që përmban faqja zyrtare elektronike e Qendrës së Botimeve Zyrtare, e cila konsiston në klikimin sipas llojit të aktit, vitit, numrit, si dhe fjalëve kyçe që përmban akti.

6. Aktet e botuara në bazën e të dhënave elektronike të akteve do të jenë të botuara edhe sipas fushave të caktuara, të cilat do të jenë të ndara në nënkategori të specifikuar. Kërkimi nëpërmjet fushave të caktuara, synon të gjejë aktin më vete, përditësimet, si dhe, nëse ka, aktet nënligjore të nxjerra në bazë e për zbatim të tij.

III. TË NDRYSHME

1. Qendra e Botimeve Zyrtare duhet të vendosë në dispozicion të publikut mjete për të lehtësuar kërkimin e këtyre të dhënave.

2. Baza e të dhënave elektronike të akteve, në përputhje me kërkesat e ligjit nr. 10325, datë 23.9.2010, “Për bazat e të dhënave shtetërore”, bën të mundur të aksesohet edhe në baza të tjera të dhënash elektronike, të cilat administrohen nga institucione të tjera shtetërore e që përmbajnë akte të botueshme lidhur me to.

3. Ndërveprimi me bazat e tjera të të dhënave shtetërore dhe të dhënat dytësore, që botohen në bazën e të dhënave elektronike të akteve, përcaktohen me urdhër të ministrit të Drejtësisë, në përputhje me rregullat e miratuara në zbatim të ligjit nr. 10325, datë 23.9.2010, “Për bazën e të dhënave shtetërore”.

4. Qendra e Botimeve Zyrtare, në bashkëpunim me institucionet shtetërore, në cilësinë e dhënësit të informacionit, kujdeset që aktet e botueshme të pabotuara deri në hyrjen në fuqi të ligjit nr. 96/2012, “Për Qendrën e Botimeve Zyrtare”, të botohen në formë elektronike në bazën e të dhënave elektronike të akteve, në një rubrikë të veçantë “Akte të pabotuara”. Për përmbajtjen e kësaj rubrike do të vlejnjë përcaktimet e bëra në pikat 10 dhe 12 të kreut I të këtij vendimi.

5. Ngarkohet Qendra Botimeve Zyrtare për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Edi Rama